



ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

«17» մայիսի 2016 թ.

N 246-Ն

ք.Ստեփանակերտ

ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ ՇՈՒՇԻԻ ՇՐՋԱՆԻ ՄԻ ՇԱՐՔ ՀԱՄԱՅՆՔՆԵՐՈՒՄ ԲԱԶՄԱՄՅԱ ԽՈՏԱՐՈՒՅՍԵՐԻ ՄՇԱԿՈՒԹՅԱՆ 2016 ԹՎԱԿԱՆԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ

Հիմք ընդունելով «Իրավական ակտերի մասին» Լեռնային Ղարաբաղի Հանրապետության օրենքի 13-րդ հոդվածը՝ Լեռնային Ղարաբաղի Հանրապետության կառավարությունը **ո Ր Ո Շ ՈՒ Մ է**.

1. Հաստատել Լեռնային Ղարաբաղի Հանրապետության Շուշիի շրջանի մի շարք համայնքներում բազմամյա խոտաբույսերի մշակության 2016 թվականի ծրագիրը (այսուհետ՝ Ծրագիր)՝ համաձայն հավելվածի:

2. Սահմանել, որ՝

1) Ծրագրի կատարման հսկողությունը վերապահվում է Լեռնային Ղարաբաղի Հանրապետության գյուղատնտեսության նախարարությանը.

2) Ծրագրի շրջանակներում իրականացվող միջոցառումների պատասխանատու է հանդիսանում Լեռնային Ղարաբաղի Հանրապետության Շուշիի շրջանի վարչակազմը.

3) Լեռնային Ղարաբաղի Հանրապետության Շուշիի շրջանի վարչակազմը կհսամյակային հաշվետվություն է ներկայացնում Լեռնային Ղարաբաղի Հանրապետության գյուղատնտեսության նախարարություն՝ սույն Ծրագրի շրջանակներում իրականացված միջոցառումների մասին.

4) Լեռնային Ղարաբաղի Հանրապետության գյուղատնտեսության նախարարությունը տնտեսական տարին ավարտելուց հետո՝ եռամսյա ժամկետում Լեռնային Ղարաբաղի Հանրապետության կառավարություն է ներկայացնում հաշվետվություն՝ կատարած աշխատանքների և իրականացրած միջոցառումների մասին:

3. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

**ԼԵՌՆԱՅԻՆ ՂԱՐԱԲԱՂԻ
ՀԱՆՐԱՊԵՏՈՒԹՅԱՆ ՎԱՐՉԱՊԵՏ**

Ա. ՀԱՐՈՒԹՅՈՒՆՅԱՆ

Հավելված
Լեռնային Ղարաբաղի
Հանրապետության կառավարության
2016 թվականի մայիսի 17-ի
N 246 -Ն որոշման

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅՈՒՆ**

ԾՐԱԳԻՐ

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՇՈՒՇԻԻ
ՇՐՋԱՆԻ ՄԻ ՇԱՐՔ ՀԱՄԱՅՆՔՆԵՐՈՒՄ ԲԱԶՄԱՄՅԱ ԽՈՏԱԲՈՒՅՍԵՐԻ
ՄՇԱԿՈՒԹՅԱՆ 2016 ԹՎԱԿԱՆԻ**

ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ

- I. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ
- II. ԾՐԱԳՐԻ ԻՐԱԿԱՆԱՑՄԱՆՆ ՈՒՂՂՎԱԾ ՄԻՋՈՑԱՌՈՒՄՆԵՐԸ
- III. ԾՐԱԳՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ

ՆԵՐԱԾՈՒԹՅՈՒՆ

Լեռնային Ղարաբաղի Հանրապետության Շուշիի շրջանի մի շարք համայնքներում բազմամյա խոտաբույսերի մշակության 2016 թվականի ծրագիրը (այսուհետ՝ Ծրագիր) ընդգրկում է Քարին տակ, Եղցահող, Հին շեն և Մեծ շեն համայնքները, որոնց հեռավորությունը մայրաքաղաք Ստեփանակերտից տատանվում է 18-55 կիլոմետրի, իսկ շրջկենտրոն Շուշիից՝ 5-42 կիլոմետրի սահմաններում: Շրջանի նշված համայնքներն ունեն 5708,18 հեկտար գյուղատնտեսական նշանակության հողեր, որից վարելահող՝ 372,68 հեկտար (239,68 հեկտարը սեփականաշնորհված է Ասկերանի շրջանի տարածքից), բազմամյա տնկարկ՝ 10,25 հեկտար, խոտհարք՝ 360,24 հեկտար, արոտավայր՝ 4605,11 հեկտար, այլ հողեր՝ 359,9 հեկտար:

Շուշիի շրջանի համայնքների համաչափ զարգացումը մեծապես պայմանավորված է համայնքների գյուղատնտեսության զարգացմամբ, քանի որ ներկայումս և տեսանելի հեռանկարում այս ենթաշրջանի բնակչության մեծ մասի կենսամակարդակի բարձրացման աղբյուր են լինելու այն եկամուտները, որոնք ստացվում են գյուղատնտեսական արտադրությունից և գյուղատնտեսության բնագավառում վարձու աշխատանքից՝ հաշվի առնելով շրջանում առկա հողային, աշխատանքային, տեխնիկական ռեսուրսների առկայությունը:

Սույն Ծրագրով ներկայացվում է Շուշիի շրջանի մի շարք համայնքների գյուղատնտեսության զարգացման 2016 թվականին իրականացվելիք միջոցառումները և ակնկալվող արդյունքները:

I. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ

Նպատակը.

Վերջին տարիների բնակլիմայական անբարենպաստ պայմանները բացասաբար են անդրադարձել շրջանի բնական կերհանդակների՝ արոտավայրերի ու խոտհարքների բերքատվության վրա, ինչը կարող է հետագայում խնդիրներ առաջացնել գյուղատնտեսական կենդանիների կերակրման առումով՝ ազդելով կենդանիների մթերատվության վրա:

Հաշվի առնելով գյուղատնտեսության համախառն արտադրանքում անասնաբուծության ճյուղի տեսակարար կշռի ավելացման անհրաժեշտությունը, անասնազվխաքանակի աճի միտումները և դրանով պայմանավորված անասնակերի

բազայի կայունացման կարևորությունը, ինչպես նաև հողերի արդյունավետ օգտագործման անհրաժեշտությունը առաջարկվում է շրջանում, բազմամյա խոտաբույսերի մշակության համար պիտանի, առկա տարածքները դնել կորնգանի մշակության տակ:

Սույն Ծրագրի հիմնական նպատակն է Լեռնային Ղարաբաղի Հանրապետության Շուշիի շրջանի համայնքներում կերային կայուն բազայի ստեղծումը՝ հաշվի առնելով անասնաբուծության զարգացման դրական առաջընթացը:

Խնդիրները.

1) շրջանի համայնքներում գյուղատնտեսության ճյուղերի համաչափ զարգացման համար անհրաժեշտ պայմանների ստեղծում.

2) կերարտադրության և անասնաբուծության զարգացման համար նպաստավոր պայմանների ստեղծում.

3) առկա գյուղատնտեսական նշանակության հողերի լիարժեք օգտագործման և հողերի վիճակի բարելավման համար հնարավորությունների ստեղծում:

II. ԾՐԱԳՐԻ ԻՐԱԿԱՆԱՑՄԱՆ ՈՒՂՂՎԱԾ ՄԻՋՈՑԱՌՈՒՄՆԵՐԸ

Շուշիի շրջանի մի շարք համայնքներում կատարած ուսումնասիրությունները ցույց են տալիս, որ համայնքներում կերարտադրության և անասնաբուծության զարգացման համար, առաջնահերթ, անհրաժեշտ է իրականացնել կերային բազմամյա խոտաբույսերի մշակություն (կորնգան):

Բազմամյա կերային մշակաբույսերի տարածքների ընդլայնումը կարևորվում է ինչպես անասունների համար կերային բազայի ապահովման, այնպես էլ վարելահողերի կառուցվածքի բարելավման տեսանկյունից: Ծրագրով նախատեսվում է բազմամյա խոտաբույսերի 50 հեկտար տարածքի մշակության համար հատկացնել 3 662 100 ՀՀ դրամ: Նշված ֆինանսական միջոցները կամ անհրաժեշտ ապրանքանյութերը կտրամադրվեն բազմամյա խոտաբույսերի տակ նախատեսված տարածքների մշակության համար (հերկ, կրկնահերկ, կուլտիվացիա, ցանք, դիզվառելիքի ձեռք բերում) անհատույց՝ շրջանի վարչակազմի կողմից ներկայացված համապատասխան հայտի հիման վրա Լեռնային Ղարաբաղի Հանրապետության գյուղատնտեսության նախարարության կողմից 2016 թվականի պետական բյուջեով «Ենթաշրջանային ծրագրերի իրականացում» միջոցառմամբ նախատեսված միջոցներից, իսկ միջոցառման իրականացման համար համապատասխան քանակությամբ սերմը հողօգտագործողներին

կտրամադրվի Լեռնային Ղարաբաղի Հանրապետությունում կերարտադրության և անասնաբուծության զարգացման 2015-2017 թվականների ծրագրի շրջանակներում:

Ծրագրի իրականացման համար 2016 թվականին պահանջվող ներդրումներն ըստ համայնքների և Ծրագրի իրագործման համար 2016 թվականին պահանջվող ներդրումներն ըստ եռամսյակների ներկայացված են NN 1 և 2 աղյուսակներում:

Աղյուսակ N 1

ԾՐԱԳՐԻ ԻՐԱԳՈՐԾՄԱՆ ՀԱՄԱՐ 2016 ԹՎԱԿԱՆԻՆ ՊԱՀԱՆՋՎՈՂ ՆԵՐԴՐՈՒՄՆԵՐԸ ԸՍՏ ՀԱՄԱՅՆՔՆԵՐԻ

Հ/հ	Համայնքը	Նախատեսվում է ցանքս (հեկտար)	Տրամադրվող ֆինանսական միջոցները (ՀՀ դրամ)		
			Պահանջվող դիզվառելիքի գումարը	Գյուղատնտեսական տեխնիկայի վարձավճար (ներառյալ եկամտահարկ)	Ընդամենը համայնքում
1	Հին շեն	14	529 200	496 200	1 025 400
2	Մեծ շեն	12	453 600	425 300	878 900
3	Եղծահող	20	756 000	708 840	1 464 840
4	Քարին տակ	4	151 200	141 760	292 960
Ընդամենը		50	1 890 000	1 772 100	3 662 100

Աղյուսակ N 2

ԾՐԱԳՐԻ ԻՐԱԳՈՐԾՄԱՆ ՀԱՄԱՐ 2016 ԹՎԱԿԱՆԻՆ ՊԱՀԱՆՋՎՈՂ ՆԵՐԴՐՈՒՄՆԵՐՆ ԸՍՏ ԵՌԱՄՍՅԱԿՆԵՐԻ

(ՀՀ դրամ)

Հ/հ	Ներդրումների նպատակը	2016 թվական	այդ թվում՝ ըստ եռամսյակների			
			1-ին	2-րդ	3-րդ	4-րդ
1.	Կերային բազմամյա խոտաբույսերի մշակություն	3 662 100		3 662 100		

III. ԾՐԱԳՐԻ ԻՐԱԿԱՆԱՅՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ

Համապատասխան ներդրումներ կատարելու դեպքում սույն Ծրագրի իրականացումից ակնկալվում է Շուշիի շրջանի համայնքներում գյուղատնտեսության ոլորտում կերարտադրության և անասնաբուծության զարգացման առաջընթաց, որն առաջիկա տարիներին կդրսևորվի հետևյալ արդյունքներով.

1) դրական տեղաշարժեր կլինեն բուսաբուծության և անասնաբուծության ներճյուղային կառուցվածքում. կավելանան կերային մշակաբույսերի տարածքները, կաթի և մսի համախառն արտադրությունը.

2) կերային մշակաբույսերի մշակությունը դրական ազդեցություն կունենա գյուղատնտեսական հողատեսքերի բերրիության բարձրացման վրա: Այն, որպես ցանքաշրջանառության կարևոր օղակ, կնպաստի դաշտերի մոլախոտերից մաքրմանը, հողի կառուցվածքի բարելավմանը, ազոտով հարստացմանը, դրանից հետո մշակվող կուլտուրաների բերքատվության բարձրացմանը.

3) անասնազլխաքանակի ավելացման արդյունքում կբարձրանա բնական կերահանդակների օգտագործման մակարդակը.

4) տեղական արտադրության հաշվին կբարձրանա անասնաբուժական մթերքներով ապահովվածության մակարդակը.

5) անասնաբուժական մթերքների արտադրության ծավալների ավելացումը կնպաստի վերամշակման ճյուղի զարգացմանը.

6) գյուղատնտեսության ոլորտի գործունեության արդյունքում կբարձրանա բնակչության զբաղվածության մակարդակը, կավելանան եկամուտները:

Իրականացվող ներդրումների հաշվին կկատարվի 50 հեկտար բազմամյա կերային խոտաբույսերի ցանքս՝ 2016 թվականի գարնանը և աշնանը, որից հետագայում կապահովվի տարեկան միջինը 250-270 տոննա համախառն բերք՝ տարվա կտրվածքով 1 տոննայի միջին արժեքը կազմում է 35 000 ՀՀ դրամ: Ստացված բերքը որպես անասնակեր օգտագործման դեպքում ակնկալվում է ստանալ միջին հաշվով 10 տոննա միս՝ կենդանի քաշով, որի ընդհանուր արժեքը գործող գներով կազմում է 10 000 000 ՀՀ դրամ:

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ-ՆԱԽԱՐԱՐ**

Լ. ԳՐԻԳՈՐՅԱՆ